



Peresitene Dieter F. Uchtdorf

Fesoasoani Lona Lua i le Au Peresitene Sili

O Outou o O'u Lima

I le avea ai ma soo o Iesu Keriso, ua valaauina i tatou ia lagolago ma faamalolo atu ae lē o le tausalaina.

O se tala na faamatalaina, i se aai na faatafunaina i le taimi o le Tāua Lona II a le Lalolagi, lea na matua faaleagaina ai se faatusa telē o Iesu Keriso. Ina ua maua e tagata o le aai le faatusa i faatafunaga, sa latou faanoanoa ona sa avea lea o se faailoga pele o lo latou faatuatuaga ma le faatasi ai o le Atua i o latou olaga.

Na mafai e tagata popoto faapitoa ona faaleleia le tele o vaega o le faatusa, ae ona sa matua faaleagaina ona aao o lea na le mafai ai ona toe faaleleia. Na fautua mai nisi latou te aumaia se tagata fau faatusa e toe faia ni lima fou, ae o isi na latou mananao e tuu ai pea faapea—o se faamanatu mautu lea o le tulaga matautia o le taua. Na iu lava ina tuu ai lava le faatusa e aunoa ma ni lima. Ae peitai, na faaopoopo e tagata o le aai i le pito i lalo o le faatusa o Iesu Keriso se faailoga e i ai upu nei: “O outou o o’u lima”

O i Tatou o Aao o Keriso

E i ai se lesona loloto i lenei tala. Pe a ou mafaufau i le Faaola, e tele lava ina ou mafaufauina o Ia ma Ona aao mafola; o aapa mai e faamafanafana, faamalolo, faamanuia, ma le alofa. Ma e talanoa o Ia i taimi uma e—aunoa ma le vaai maualalo *lalo* i tagata. E alofa o

Ia i e lotomauualalo ma e agamalu ma savavali faatasi ma i latou, ma aao atu ia i latou ma ofoina atu le faamomoe ma le faaolataga.

O le mea lēna na Ia faatinoa i le taimi o Lona soifuaga faaletino; o se mea foi semanu Na te faatinoina pe ana fai o loo Ia soifua faatasi ma i tatou i le aso; ma e ao foi ona tatou faatinoina i le avea ai ma Ona soo ma ni tagata o Le Ekalesia a Iesu Keriso o le Au Paia o Aso e Gata Ai.

Ua tosina atu o tatou manatu ma loto ia te Ia, i lenei taeao matagofie o le Eseta—o le Faamoemoe o Isaraelu ma le Malamalama o le Lalolagi.

Ao tatou mulimulitai i Ana faaitaitaiga atoatoa o le a mafai ai la ona avea o

tatou lima ma Ona aao; o tatou mata, ma Ona fofoga; o tatou Loto, ma Lona finagalo.

E Mafai e o Tatou Lima ona Opoina Mai


Ou te matuai fiafia i le ala o loo auna atu ai tagata o le Ekalesia i isi. Ao matou faalogoina a outou osigataulaga le manatu faapitoa ma le alofa ofoofogia, e faatumuina o matou loto i le agaga faafetai ma le fiafia. O outou o se malamalama pupula i le lalolagi, ma ua iloa outou i lo outou agalelei ma le agaalofa i le kelope atoa.

Ae paga lea, mai lea taimi i lea taimi tatou te faalogo ai foi i tagata o le Ekalesia o e ua lotovaivai ma, sosoo ai, ma le le toe o mai ma auai mai i sauniga Lotu, ona ua latou manatu latou te le talafeagai.

A o ou laitiiti, i le taimi o le maea ai o le Tāua Lona II o le Lalolagi, na i ai Siamani i se tulaga faatafunaina ma faaleagaina. O le toatele o tagata na fiafi, mamai, ma maliliu ai. Ou te manatua ina lelei lava ia uta agaalofa o meaai ma lavalava mai le Ekalesia i le Aai o Sate Leki. E oo mai i lenei aso, ou te manatua ina pea le manogi o lavalava ma le mafai lea ona ou tofoina pea le suamalie o apa fualaauina.

Sa i ai foi nisi na liliu mai i le Ekalesia ona o oloa sa latou mauaina ai i lenei taimi. O nisi o tagata o le ekalesia na vaai maualalo i nei tagata fou na liliu mai. Na latou faaigoaina i latou i se igoa faanoono o le: *Büchsen Mormonen* po o “Mamona-Meaa Tuuapa.” Latou te le fiafia i nei tagata fou o le ekalesia ona sa latou talitonu faapea e uma loa ona foia o latou manaoga faaletino, ona latou tuua lea o le ekalesia.

E ui o nisi na o ese, ae toatele na tumau ai—na latou o mai i le lotu, tofo i le suamalie o le talalelei, ma lagona le opo alofa mai a uso ma tuafafine popole. Na latou mauaina le malo.”



Ma i le taimi nei, o le tolu ma le fa autupulaga mulimuli ane, o le toatele o aiga ua saili lo latou auai i le Ekalesia i tua i nei tagata na liliu mai.

Ou te faamoemoe o le a tatou faafeiloaia ma alolofa atu i fanau uma a le Atua, e aofia ai i latou o e atonu e oofu, foliga, tautatala, pe faatinoina ni mea e ese mai ai. E lē lelei le faia ina ia lagonaina e isi latou te le atoatoa. Ia tatou, siitia i latou o e o siomiaina i tatou. Ia tatou tuu atu se lima faafeiloai. Ia tatou tuu atu i luga o o tatou uso ma tuafafine i le Ekalesia se fuataga faapitoa o le agaalofa, agalelei, ma le alofa ina ia latou lagonaina, ua latou mauaina lo latou aiga.

Pe a tofotofoina i tatou e faamasino atu, ia tatou mafaufau i le Faaola, o le “alofa i le lalolagi, e oo ina tuuina atu lona lava soifua ina ia aumaia tagata *uma* ia te ia.

[Ma] na fetalai mai o ia: O mai ia ia te au o outou tuluiga uma o le lalolagi . . . [a o le], tofi o tagata *uma* e tutusa lava ma ua le vaosia se tasi.¹

Ao ou faitau i tusitusiga paia, e foliga mai o i latou o e mauaina aoaiga sili ona malosia a le Faaola e matele lava ia i latou o e manatu faamaualuga ia i latou lava ona o a latou oa, faatosinaga, pe amiotonu faafoliga.

O se tasi o mea na tupu lea na aoao atu ai le Faaola i se faataoto i ni alii se toalua o e na o i le malumalu e tatalo. Na tatalo se tasi o alii, o se Faresaio faaalologia, “Le Atua, ou te faafetai atu ia te oe, ina ua ou le pei o isi tagata, o e fao mea, o e amio leaga, o e mulilulua, e le pei o le la telona foi. E tailua i vaiaso ona ou anapogi, ou te avatu mea e sefulu ai mea uma ou te maua.”

O le isi tagata, o se telona e itagia, na tu “mamao atu, [ma] e le mafai ona tepa ae ona mata i le lagi, a ua popo lona fatafata, ua faapea atu, Le Atua e , ia e alofa mai ia te au le tagata agasala.”



Ma na fetalai atu Iesu, “Ou te fai atu ia te outou, na alu ifo lona tagata i lona fale ua tauamiotonuina a e le faapele isi.”²

O le mea moni lava, tatou te “agasala uma lava, ma ua le oo i le viiga mai le Atua.”³ Tatou te manaomia uma lava le alofa mutimutivale. I na aso amuli pe a valaauina i tatou i luma o le nofoa faamasino o le Atua, pe tatou te le faamoemoe ea ia faamagaloina o tatou faaletonu e tele? Pe tatou te le manao ea e lagonaina le opo mai a le Faaola?

E matua sao ma tatau lo tatou faalateleina atu i isi o le mea lava lea o loo tatou faamemelo atu i ai ma le nautai mo i tatou lava.

Ou te le o fautuaina atu ia tatou taliaina le agasala po o le le manatu i le amioleaga i o tatou olaga faaletagata lava ia po o le lalolagi. Ae ui i lea, i lo tatou naunau, tatou te le mautonu ai i nisi o taimi e uiga i le agasala ma le tagata agasala ma e vave tele ona tatou tausala ina ae laitiiti tele lo tatou agalelei atu. Ua tatou iloa mai faaaliga i nei onapo e “taua tele le aoga o agaga i le silafaga a le Atua.”⁴ E tusa lava le le mafai ona tatou fuaina o le taua o se isi

agaga ma le le mafai ona tatou fuaina o le lautele o le lalolagi. O tagata uma tatou te feiloai i ai o se TST [tagata sili le taua] i lo tatou Tama Faalelagi. Pe a tatou malamalama loa i lona mea, ua mafai foi ona tatou malamalama i auala e tatau ona tatou taulimaina ai o tatou uso a tagata.


Na fai mai se tasi o tamaitai ma loimata o le na aafia i ni tausaga o tofotofoa ma faanoanoaga faapea, “Ua ou iloa nei ua pei lava a’u o se 20-tala-pepa tuai—ua maanuminumi, masaesae, palapala, sauaina, ma mailaila. Ae o a’u lava o se o se 20-tala-pepa. O loo i ai lo’u aoga. Atonu e ui lava ua lē lelei o’u foliga, ma e ui ua ou palapala ma ua tuai, ae o loo atoa pea lo’u aoga, o se 20 tala.”

E Mafai e o Tatou Lima ona Faamafanafana Atu

I lo tatou iloa ai o nei mea, ia tatou aapa atu i isi ma o tatou loto ma lima mafola, aua o loo savalia e tagata uma lona lava auala faigata. I le avea ai ma soo o Iesu Keriso, lo tatou Alii, ua valaauina i tatou ia lagolago ma faamalolo atu ae lē o le tausala. Ua poloaiina i tatou e faanoanoa faatasi ma e faanoanoa ma faamafanafana i e ua tatau i ai le faamafanafana.⁵

I le avea ai la ma ni Kerisiano e le o se tulaga talafeagai lo tatou mafaufau ifo faapea o e ua mafatia ua talafegai tonu lava i ai lo latou puapuagatia. O le Aso Sa o le Eseta o se aso lelei lea e manatua ai le tauaveina ma le naunautai e lo tatou Faaola i Ona Lava luga o tatou tiga ma ma’i ma puapuga uma lava—e oo lava ia i tatou o e foliga mai ua talafeagai o tatou mafatiaga.⁶

Ua tatou faitauina i le tusi a Faataoto faapea “e alofa le uo i aso uma lava, ae fanau le uso mo le aso vale.”⁷ Ia tatou alolofa i taimi uma lava. Ma ia tatou i ai faapitoa iina mo o tatou uso ma tuafafine i taimi o mafatiaga.



E Mafai e o Tatou Lima ona Auauna Atu

O se talafatu anamua a tagata lutaia i ni auso tama se toalua, o Abram ma Zimri, o e ona se faatoaga ma na galulue faatasi ai. Na la malilie e vaelua tutusa le galuega ma le seleselega. I se tasi po ao lata i le seleselega, sa le mafai ona moe ia Zimri, ona e lei foliga sa’o le maua e Abram na o le ‘afa o le seleselega, aua e i ai lona toalua ma atalii e toafitu e fafaga, a ua tele naua mo ia, aua e na o ia lava e fafaga.

O lea na fai ai ofu o Zimri ma agai lemu atu i le faatoaga, ma ia aveina le tasi vaetolu o lana seleselega ma tuu i le faaputuga a lona uso. Ona ia toe foi lea i lona moega, ua faamalieina ona

ua ia iloa ua ia faia le mea sa’o.

Na le mafai foi ona moe Abram ia, mo sina taimi. Na ia mafaufau i lona uso o Zimri, o lē e na o ia lava ma e leai ni ona atalii e fesoasoani ia te ia i le galuega. E le talafeagai ia Zimri, lea e galue malosi na o ia lava, ona ia mauaina na o le afa o le seleselega. E moni lava, e le fiafia i ai le Atua. Ma o lea na alu lemu ai Abram i le faatoaga, ma ave le tasi vaetolu o lana seleselega ma tuu i le faaputuga a lona uso pele.

I le taeao na sosoo ai, na o ane le auso i le faatoaga ma na ofo uma i laua i le vaai atu e foliga tutusa lava ia faaputuga. I lena po na o lemu ai le auso i fafo ma toe faia foi a la’ua taumafaiga o le po na mavae atu. Ae i le taimi la lea na maua e le tasi le isi, ma ina ua la iloaina, sa la fetagisi ma feopoai. Sa le mafai ona la tautatala, ona ua matua aafia o la loto i le alofa ma le agaga faafetai.⁸

O le agaga lena i le alofa: ia tatou alolofa atu i isi e pei o i tatou lava,⁹ saili lo latou fiafia, ma faia ia i latou e pei ona tatou faamoemoe ia latou faia mai foi ia i tatou.¹⁰

E Manaomia e le Alofa Moni ia Faatinoga

E manaomia e le alofa moni ia ni faatinoga. E mafai ona tatou tautatala i le alofa i le aso atoa—e mafai foi ona tatou tusia ni faamatalaga po o ni solo e folafola mai ai, lagiina ni pese e vivii mai ai, ma lauga mai i sauniga e faamaalosia i ai—ae seiloga ua tatou faaalua lena alofa i ni faatinoga, e le aoga a tatou upu ua na o se “apa memea taalili, po o se sumepalo tagitagi.”¹¹

Sa le na ona fetalai mai o Keriso e uiga i le alofa; na Ia faaalua i aso taitasi o Lona soifuaga. Na te lei aveeseina lava o Ia mai isi tagata. I le lotolotoi o tagata na aapa atu ai Iesu i le toatasi. Na Ia laveaiina le na leiloa. Na te lei aoina se vasega e uiga i le aapa atu ma

le alofa ona tuu atu lea o le galuega moni i isi. Sa lē na ona Ia aoao atu ae na Ia faaali mai foi ia i tatou le ala e “fesoasoani ai i e vaivai, ia sii ae lima o loo tautau i lalo, ma faamalositua tulivae vaivai.”¹²

E silafia e Keriso le auala e auauna atu ai isi ma le atoatoa. Pe a aapa mai aao o le Faaola, o le a uunaia i latou u e pai atu ia te Ia e ave ma tagata sili atu le maoae, sili atu le malosi, ma sili atu le lelei i le ave ai ma se taunuuga.

Afai la o i tatou o Ona aao, pe le tatau ea ona tatou faia faapea?

E Mafai ona Tatou Alolofa e pei ona la alofa mai

Na faaali mai e le Faaola ia faamua-mua atoatoa mo o tatou olaga, o o tatou aiga, o a tatou uarota, o o tatou nuu, ma o tatou atunuu, ina ua Ia fetalai e uiga i le alofa, o le poloaiga sili “ua autu ai le tulafono uma ma le au perofeta.”¹³ E mafai ona tatou faaalua o tatou olaga e mafaufau faavalea ai i mea o le olaga, le tulafono, ma lisi uumi o mea e fai; peitai afai tatou te lē amana’iaina tulafono sili, ua tatou misia le fatu ma o ni āo i tatou e leai se vai o i ai, ua felafoaiina foi i matagi; ma o ni laau foi e leai ni fua.¹⁴

A aunoa ma lena alofa i le Atua le Tama ma o tatou uso a tagata, ua na o ni faafoliga i tatou o Lana Ekalesia a ua leai se tino. O le a le aoga o lo tatou aoao atu e aunoa ma se alofa? O le a le aoga o a tatou galuega faafaifeautalai, malumalu, po o le uelefea e aunoa ma se alofa?

O le alofa na musuia ai lo tatou Tama Faalelagi e fausia o tatou agaga; o le mea lea na taitaiina ai lo tatou Faaola i le Togalaau o Ketesemane ina ia totogiina e Ia a tatou agasala. O le alofa o le mafuaaga aupito maua luga lea o le ata o le faaolataga, o le puna o le fiafia, o le toe faafouina o le

tautotogo o le faamaloloina, ma o le puna taua o le faamoemoe.

Ao aapa atu o tatou lima ma loto i le alofa faaKeriso i isi, o le a tupu ia i tatou se mea matagofie. O le a faamaloloina, ma toe faaleleia, ma sili atu ona malosi o tatou lava agaga. O le a sili atu ona tatou fiafia, sili atu ona toafilemu, ma sili atu ona mataala ma iloa musumusuga a le Agaga Paia.

Faatasi ai ma lo'u loto ma lo'u agaga atoa, ou te tuuina atu le faafetai i lo tatou Tama Faalelagi mo Lona alofa mo i tatou, mo le meaalofa o Lona Alo, mo le soifuaga ma faataitaiga a Iesu Keriso ma mo Lana taulaga atoatoa ma le le manatu faapito. Ou te olioli i le mea moni e lē o maliu Keriso ae ua toetu mai le tuugamau! O loo soifua o Ia ma ua toe afio mai i le lalolagi e toefuatai Lana pule ma le talalelei i tagata. Ua Ia tuuina mai ia i tatou le faataitaiga tonu o le ituaiga o alii ma tamaitai e tataua ona aveai i tatou.

I lenei Aso Sa o le Eseta, ma i aso uma, pe a tatou mafaufau ma le migao ma le matau i auala o loo opoina atu ai i tatou, ma faamafanafanaina i tatou, ma faamaloloina ai i tatou e lo tatou Faaola, ia tatou tautino atu e aveai ma Ona aao, ina ia mafai ai e isi e ala atu ia i tatou ona lagonaina Lana opo alofa mai. I le suafa o Iesu Keriso, amene. ■

FAAMATALAGA

1. 2 Nifae 26:24–25, 28; faaopoopo le faamamafa.
2. Tagai Luka 18:9–14.
3. Roma 3:23.
4. Mataupu Faavae ma Feagaiga 18:10.
5. Mosaea 18:9.
6. Tagai i le Alema 7:11–13; Mataupu Faavae ma Feagaiga 19:16.
7. Faataoto 17:17.
8. Tagai Clarence Cook, “Abram and Zimri,” in *Poems by Clarence Cook* (1902), 6–9.
9. Tagai i le Mataio 22:39.
10. Tagai i le Mataio 7:12.
11. 1 Korinito 13:1.
12. Mataupu Faavae ma Feagaiga 81:5.
13. Mataio 22:40.
14. Tagai i le Iuta 1:12.